

[*en marge*] Parochialis sancti Nicolai Felicetti

Die 25 iunii in tertiis.

Praefatus dominus visitator visitavit ecclesiam parochialem sub invocatione sancti Nicolai, plebaniam nuncupatam de Felicetto, cuius ad praesens est plebanus et rector admodum reverendus dominus Fabianus de Aloysiis, quam assequutus fuit triginta sex circiter abhinc annis per resignationem eius favori factam ab admodum reverendo domino Marcello de Mancinis de Belgodere, dictae ecclesiae tunc temporis plebano, percipiens in annuo reddito libras mille menotae [*sic*] genuensis, consistentes in decimis, primitiis, oblationibus et in aliis fructibus provenientibus ex bonis stabilibus dictae ecclesiae.

Visitavit sanctissimum sacramentum, quod invenit asservari in pixide ex auricalco cum cuppa argentea in totum deaurata, [314r] conopeo varii coloris instructa, ad formam, et inservit pro adoratione et communionibus generalibus. Visitavit aliam pixidem parvam ex argento, quae inservit pro asportando sanctissimo viatico ad infirmos et est ad formam, mandavit autem provideri de bursa serica cum suis cordulis sericis, unde appendatur ad collum sacerdotis, infra trimestre. Visitavit ostensorium ex auricalco in totum deauratum cum vitro et cruce in eius summitate, et est ad formam; inservit pro expositione et asportatione sanctissimi in processionibus. Visitavit baldachinum sericum elegantis formae pro processionibus cum sanctissimo, nec non etiam umbellam ad formam, mandavit tamen in eius summitate crucem apponi. Velum humerale albi coloris et turribulum ex auricalco cum eius navicula adsunt ad formam. Pluviale non adest, ideo mandavit saltem infra biennium de eo provideri. Lampas ante ipsum sanctissimum sacramentum continuo ardet ex elemosinis et contributionibus communitatis, quae etiam providet de cereis pro deferendo sanctissimo. Dictum sanctissimum sacramentum asservatur ad altare maius in tabernaculo ligneo in totum deaurato, conopaeo rubei coloris instructo et etiam aliis conopaeis diversi coloris secundum tempora proviso, munito sera et clave, et supra se pendet etiam baldachinum, omnia ad formam.

Visitavit fontem baptismalem, cuius vas est marmoreum, ciborium vero ligneum, conopaeo cerulei coloris instructum cum cruce in eius summitate, munitum sera et clave quae detinetur paenes dominum plebanum ad formam. Vidit cochlear ex argento pro suscipienda aqua in baptizandis infantibus et etiam vidit in eo asservari vasa stamnea oleorum chrysmatis et cathecumenorum ad formam, et quia in eodem fonte invenit oleum infirmorum in vase argenteo, ideo mandavit in posterum asservari in fenestrula conficienda in pariete prope altare maius in cornu

evangelii, quam mandavit intus vestiri panno violacei coloris et ostiolo muniri cum ser<r>a et clave detinenda paenes dominum plebanum, desuper inscribendo litteris maiusculis *Oleum infirmorum*.

Prope dictum fontem visitavit sacrarium, quod mandavit muniri hostiolo cum ser<r>a et clave.

Doctrina christiana docetur singulis diebus dominicis a prandio per dominum plebanum.

Nuptiae raro benedicuntur, ideo mandavit in posterum benedici [314v] ad formam missalis romani, et si sponsi negligentes fuerint in dicta benedictione petenda contra eos poenam (etc.).

Visitavit altare maius, quod manutinetur a communitate, nullum habens redditum nec onus, et est sufficienter provisum de necessariis ad celebrationem missae, pro qua celebranda providetur de candelis a communitate dicti loci.

Visitavit altare sub invocatione sanctissimi Rosarii, quod pariter manutinetur a communitate et est provisum de icone et de reliquis necessariis ad celebrationem missae absque ullo reddito et onere, coram eo pendet lampas continuo ardens ex elemosinis piorum. In dicto altari est erecta societas tam virorum quam mulierum auctoritate apostolica cum privilegiis et indulgentiis, et ab eadem societate solet recitari rosarium ter per hebdomadam ad formam bullae.

Visitavit altare sub invocatione sancti Andreae manutentum ab eadem communitate, provisum de icone et de reliquis necessariis ad celebrationem missae quae in eo solet celebrari absque ullo reddito et onere.

Visitavit altare sub titulo Purgatorii pariter manutentum a communitate, est sufficienter provisum de icone et de aliis necessariis ad celebrationem missae; habet annum redditum librarum viginti monetae genuensis pro tot missis celebrandis in dicto altari. Procuratores dictae ecclesiae solent renovari per biennium et computa tunc temporis redduntur coram domino plebano et novis procuratoribus.

Vidit sedem confessionalem et mandavit provideri de lamine forato et in ea etiam apponi summarium bullae Cenaee una [cum] schedula casuum reservatorum. Vidit etiam pulpitum ex cal[c]e fabrefactum ad formam, in quo solet saepe saepius concio haberi ad populum per praedicatores religiosos.

Vidit campanile cum duabus campanis elegantis autem formae. Corpus ecclesiae est

dealbatum et ad formam, sicut etiam eius fores, munitae clave quae detinetur paenes dominum plebanum.

In dicta ecclesia reperiuntur quinque monumenta sepulchralia, tria manentur a diversis patronis privatis et duo sunt communia. Mandavit fieri alium tumulum pro parvulis sepeliendis, saltem infra biennium.

[315r] Visitavit suppellectilia sacra et invenit satis abundantia et perpolite custodita in quodam scamno, quod asservatur ad formam in choro, et etiam in capsis in eodem choro, mandavit tamen dictum scamnum et dictas capsas muniri clavibus, quae detineri apud dictum plebanum mandavit.

In hac [ecclesia] est erecta societas mulierum auctoritate ordinarii sub invocatione beatissimae Virginis, quae gubernatur a domino plebano sub quibusdam regulis ab eodem ordinario approbatis, habet suas officiales, quarum caput vocatur priora, et renovantur vel confirmantur singulis annis, habent massam pecuniariam, de qua solent providere sorores defunctas in earum depositione de septem libris cerae, et ecclesiam de caeris et etiam de suppellectilibus sacris.

In hac parochia adsunt duo presbiteri, scilicet presbiter Ioannes Franciscus de Vincensellis (*lire Vincentellis*) et presbiter Ioannes Baptista de Aloysiis, adsunt etiam tres clerici, scilicet Franciscus Pizzutus, Stephanus Aloysius, Io<so>seph de Vincensellis (*lire Vincentellis*), et omnes prout testatur dominus plebanus sunt bonae vitae et famae. Rep[er]iuntur duae mulieres quae inserviunt sub regula Servorum beatae virginis Mariae et induunt habitum nigri coloris cum velo albo et inhabitant in suis domibus et aedificationem praestant, prout dominus plebanus attestatur.

Et quia dictum fuit <dictum> aliquando cordas campanarum infrangi, ita ut dictae campanae nequeunt sonare, cum detrimento servitii divini, ideo mandavit fabricari scalas unde possit facile ascendi ad dictas campanas, et debeat dictus plebanus providere de dictis scalis et cordis sumptibus ipsius communitatis, et etiam debeantur per dictum dominum plebanum in posterum dari signum ter in diem suis horis solitis de salutatione angelica.

[*en marge*] Oratorium sanctae Crucis

Visitavit oratorium sub invocatione sanctae Crucis, quod manentur a confraternitate ibi erecta auctoritate ordinarii, quae inservit sub quibusdam capitulis non adhuc ab ordinario approbatis. Dicti confratres induunt cappas albas et habent suos officiales, cuius [caput] dicitur prior, renovantur quater per annum exceptis massario et procuratoribus durantibus ad annum. Habent massam pecuniariam constitutam ex contributionibus annuis certis dictorum fratrum, de

qua solent providere confratres defunctos de ceris pro sepulchralibus exequiis et etiam de elemosinis [315v] pro missis celebrandis. Visitavit altare, quod manutenetur a confraternitate, et est etiam sufficienter provisum de icone et de caeteris necessariis ad celebrationem missae quae in eo aliquando solet celebrari absque ullo reddito et onere. Suppellectilia sacra dictae confraternitatis ut melius custodiantur asservantur in ecclesia parochiali, quae est propinqua dicto oratorio. Singulis diebus festivis congregantur confratres in dicto oratorio et solent recitare officium beatae Mariae virginis et alias praeces effundere. Corpus oratorii est dealbatum et est satis ad formam, est etiam scamnis ligneis circum circa septum et eius fores sunt munitae clave quae detinetur apud priorem, et sunt ad formam.

Vidit libros parochiales et mandavit omnino servari formam ritualis romani tam in matrimoniis quam in nominibus baptizatorum conscribendis, mandavit etiam confici librum de statu animarum. Animae huius parochiae sunt in totum quatuor centum circiter, ex quibus communicantur ducentum et sexaginta, et non omnes paruerunt praecepto ecclesiae, ideo mandavit contumaces admoneri ut pareant, et si non paruerint denunciari curiae episcopali, et ut in posterum certo certius sciatur an omnes communicaverint mandavit distribui singulis schedulas et eas r[e]colligi priusquam tempus paschale terminetur.

Visitavit aedes canonicales, in quibus de praesenti inhabitat dominus plebanus, et invenit sufficientes.

[*en marge*] Oratorium sancti Rocch[hi]

Visitavit oratorium campestre sub invocatione sancti Rocchi situm intra limites parochiae sancti Nicolai de Feliceto, quod manutenetur a communitate, et in eo visitavit altare pariter manutentum a communitate, provisum de icone et de reliquis necessariis ad celebrationem missae quae in eo aliquando solet celebrari de consensu domini plebani. Suppellectilia sacra asservantur in scamno ecclesiae parochialis sancti Nicolai. Corpus oratorii est dealbatum et bene ad formam, et fuit erectum et benedictum auctoritate ordinarii. Fores dicti oratorii sunt ex cancellis ligneis absque sera secreta et clave, de quibus mandavit provideri infra mensem.